

Procedura imenovanja u Ustavni sud FBiH mora se nastaviti

Na sastanku s visokim predstavnikom Valentinom Inzkom, koji je održan danas u Sarajevu, predsjednik i potpredsjednici Federacije Bosne i Hercegovine, Živko Budimir, Mirsad Kebo i Svetozar Pudarić, složili su se da poduzmu sve potrebne korake kako bi osigurali što skorije imenovanje sudija na upražnjena mjesta u Ustavnom sudu Federacije Bosne i Hercegovine.

Visoki predstavnik je pozdravio opredjeljenje predsjednika i dva potpredsjednika da nastave rad na ovome zadatku bez daljnog odlaganja kako bi se početkom januara imena mogla proslijediti Domu naroda FBiH na usvajanje.

“Imajući u vidu trenutne sporove u Federaciji, nikada nije bilo potrebnije imati funkcionalne institucije – posebno Ustavni sud,” rekao je Inzko.

Visoki predstavnik također je pozvao predsjednika i potpredsjednike da nastave s praksom ustanovljenom tokom posljednjeg postupka nominacije, odnosno da kandidate razmatraju zajedno kako bi došli do usaglašenog prijedloga.